

## MAMI JARUM

Afrah Munira Binti Yusof

### ROJAK MEE

27 November 2017(Isnin)

Markonah Tulip merupakan seorang guru agama di salah sebuah sekolah rendah kebangsaan yang terletak di bandar Shah Alam. Hari ini ialah hari pertama cuti sekolah akhir tahun 2017, Markonah membuat keputusan pada dirinya untuk meraikan hari pertama cuti tersebut dengan mengatur satu perjumpaan bersama sahabat-sahabat lamanya semasa sama-sama belajar di Universiti Mu'tah Jordan dahulu. Jam menunjukkan tepat pukul 9:00 pagi, dengan riak wajah yang girang Markonah mencapai telefon bimbit berwarna kuning keemasan yang berjenama *Apple* model *iPhone 7 Plus*, lalu membuat panggilan kepada dua orang sahabat karibnya iaitu Tuminah Buyong dan Sapinah Turap.

Setelah menghubungi kedua-dua sahabatnya itu, kata putus dicapai untuk mereka berkumpul bersama-sama menikmati rojak mee yang terkenal dengan keenakannya di sebuah restoran yang terletak di seksyen 15 Shah Alam pada jam 12:00 tengah hari.



## ***EGO GENG USTAZAH***

Jam menunjukkan pukul 11:00 pagi, Markonah sampai awal daripada kedua-dua sahabatnya. Sengaja dia berbuat begitu kerana mahu membuat kejutan dengan membuat pesanan rojak mee khusus untuk Tuminah dan Sapinah yang menjadi kegemaran mereka sejak awal perkenalan mereka pada tahun 2007.

Tepat jam 12:00 tengah hari, kelihatan dua susuk tubuh yang sangat dirindui oleh Markonah itu mula melangkah masuk ke dalam restoran. Tuminah tersenyum lebar sambil melambaikan tangan ke arah Markonah yang dari awal hanya melihat telatah kedua-dua sahabatnya itu. Markonah menanti di meja yang sudah dipenuhi dengan hidangan enak, dia menghulurkan tangannya untuk bersalaman dengan dua sahabatnya itu.

“Assalamualaikum...apa khabar kamu berdua ini? Lama sungguh tidak dengar berita...jika aku tidak menghubungi kamu berdua pasti kita tidak akan berjumpa sampai bila-bila lah ya...” soalan betubi-tubi keluar dari mulut Markonah seperti peluru berpandu. Tanpa disedari Markonah menyingkap lengan baju kurungnya sambil menunjuk-nunjuk jari telunjuknya ke arah Tuminah dan Sapinah. Sambil mengambil tempat duduk mata Tuminah terbeliak kerana terpandang ke arah lilitan gelang yang pelbagai bentuk berada di pergelangan tangan Markonah. Sapinah hanya terdiam tanda tidak bepuas hati dengan kenyataan Markonah.

Tuminah: “Wah! Hebatnya kau Markonah, dah nak sampai ke siku emas kau tu. Pasti banyak zakat yang kau dah bayar setiap tahun kan?”

Markonah: “Kau ni Tumin, tengok la emas aku ni, semuanya ada campuran perak, yang ni pula bertatah berlian, tengok ni ha...” sambil menunjukkan emas yang berlingkar di tangannya. Disambung lagi “Kau tak tau ke? Kalau emas bercampur dengan benda lain tak perlulah nak keluarkan zakat...pakai la banyak mana pun emas ni, tak payah keluarkan zakat sebab bercampur kan... pandai tak aku berhelah?” Markonah mengangkat keningnya kepada Tuminah dengan muka bangga sambil mengembangkan hidungnya.

Tuminah dan Sapinah mula keliru, tetapi mereka masing-masing menyembuyikan muka keliru mereka daripada Markonah agar mereka juga dilihat sama bijak dan setanding dengan sahabat mereka itu.

Sapinah: “Betul juga tu, bijak...bijak...bijak kau Markonah” kata-kata pujian itu dilafaz hanya untuk mengambil hati Markonah sahaja.

Riak wajah Markonah jelas menunjukkan berpuas hati dengan pujian itu. Sapinah pula merasa amat bersalah dengan pujian palsu yang telah disuarakannya itu terhadap Markonah, tetapi egonya itu masih menebal. Sejurus kemudian, Sapinah mendapat

idea untuk memperbetulkan keadaan itu, lalu dia melontarkan pandangannya kepada Markonah.

Sapinah: “Konah...apa kata selepas makan ini, kita pergi ke Majlis Agama Islam Selangor, banyak kemusykilan kita yang boleh terjawab di sana. Lagipun, kalaulah kau layak mengeluarkan zakat, bolehlah kau bayar sahaja terus di kaunter zakat itu nanti. Aku bukannya apa... aku memang la pandai tentang zakat ni...sama la macam kau, tapi cuma aku rasa mungkin lain sikit cara kiraan zakat di Selangor ini berbanding di Penang tempat kelahiran kau itu. Betul tak?”

Sapinah mula memancing jawapan positif dari Markonah. Kelihatan Markonah hanya mengetap kedua-dua bibirnya sambil mengipaskan tangannya ke muka berkali-kali bagi mendapatkan angin. Tuminah hanya menundukkan pandangannya seraya berharap agar Markonah bersetuju dengan ajakan Sapinah. Tiba-tiba Markonah menampar bahu Sapinah lalu berkata:

Markonah: “Setuju! Kalau begitu, selepas makan ini kita solat zohor di masjid Shah Alam, kemudian kita terus menuju bangunan Lembaga Zakat Selangor ya...” Markonah mula merancang perjalanan dengan riak muka yang meyakinkan.

Tuminah dan Sapinah menarik nafas lega sambil menganggukkan kepala mereka tanda bersetuju dengan rancangan Markonah.

Tuminah: “Eh...cepat la makan, aku tak sabar nak menjamah rojak mee ini, dari tadi lagi kita asyik bersembang sahaja” sambil dia menarik pinggan yang berisi rojak mee itu untuk dijamahnya.

Markonah: “makan lah...hari ini aku belanja, aku kan mami jarum jutawan emas...”

Sapinah: “Kalau ye pun nak cepat...jangan sampai lupa baca doa makan...” sapanya kepada Tuminah yang cepat benar memasukkan makanan ke mulut.

Setelah selesai makan, mereka bertiga menaiki kereta Markonah menuju ke destinasi seperti yang telah dirancang.

### ***BERHUTANG DENGAN ALLAH***

Jam di tangan Markonah menunjukkan pukul 3:00 petang. Setibanya mereka di hadapan kaunter pungutan zakat Lembaga Zakat Selangor, terus mereka mendapatkan petugas di kaunter yang tiada pelanggan. Ketiga-tiga mereka telah mengutarakan beberapa persoalan berkaitan zakat emas perhiasan. Akhirnya masing-masing berpuas

hati dengan jawapan yang membantu mereka membuat beberapa keputusan terhadap zakat emas perhiasan, sekiranya diabaikan ia seumpama berhutang dengan tuhan.



## OBJEKTIF

1. Mengenalpasti hukum, bentuk dan syarat-syarat emas perhiasan yang wajib dizakatkan.
2. Megetahui nisab serta cara pengiraan zakat emas perhiasan mengikut negeri-negeri di Malaysia.

## SOALAN

1. Apakah bentuk emas perhiasan yang wajib dizakatkan?
2. Berapakah nisab pada emas perhiasan?
3. Apakah syarat-syarat yang diwajibkan zakat ke atas emas perhiasan?
4. Berapakah kadar yang wajib dizakatkan berdasarkan bentuk-bentuk emas tertentu?
5. Bagaimanakah penetapan kaedah pengiraan zakat terhadap emas perhiasan yang bercampur dengan logam lain, bertatah belian atau permata?
6. Jelaskan perbezaan paras minimum (nisab) terhadap harta zakat emas perhiasan antara negeri Selangor dan negeri-negeri lain di Malaysia.
7. Tunjukkan cara pengiraan zakat emas perhiasan di Selangor serta di negeri-negeri lain?